

〔清〕朱彝尊 輯錄

明詩綜

第四冊

中華書局

朱彝尊
輯錄

明詩綜

第四冊

中華書局

明詩綜卷三十五

小長蘆 朱彝尊 錄

雪苑 宋 筠 緝評

唐皋一首

皋字守之，歙縣人。正德甲戌，賜進士第一，授修撰，進侍講學士。

明妃曲

黃金不買畫圖中，從此春花閉漢宮。到得君王識傾國，無人主議罷和戎。

蔡昂一首

昂字衡仲，山陽人。正德甲戌，賜進士第三，除翰林編修，累官禮部左侍郎，贈尚書。有《頤貞堂稿》。

送朱伯仁任四川行都司斷事

白帝秋風動，烏蠻夕照含。憐君游宦處，地勢極西南。殊俗聊相問，軍謀亦共參。雄飛方自此，休說鬢藍鬢。

霍韜一首

韜字渭先，南海人。正德甲戌進士，累官太子少保，禮部尚書，兼翰林院學士。贈太子太保，諡文敏。有《渭厓文集》。

贈方棠陵用陶飲酒韻

張弓射飛鳥，巧者猶能得。君子履周道，豈爲多岐惑。義命良獨安，行止順通塞。遠之垂萬世，近之範一國。珍重君此行，時哉惟語默。

劉儲秀一首

儲秀字士奇，咸寧人。正德甲戌進士，繇刑部主事，累遷湖廣按察使，歷戶部侍郎，仕至兵部尚書。

送龍長史之武昌

荆衡山漠漠，江漢水湯湯。送汝從茲去，何時到武昌。楚筵堪設醴，漢署憶含香。北上多鴻雁，音書好寄將。

簡霄二首

霄字騰芳，新喻人。正德甲戌進士，累官南京兵部右侍郎。有《蓉溪集》。

過雪垣番寨

雪垣傍流沙，風烟幾十家。蓬頭男髻菁，編髮婦耕畬。皮甲張藤盾，毛衣綴線麻。也知天子使，羅拜接江涯。

潞河舟中作

潞水經年別，風塵又覺非。岸蘆迎櫂舞，檣燕掠人飛。澤國魚梁竭，江城候吏稀。人烟沙草外，一縷起斜暉。

陸杰一首

杰字元望，平湖人。正德甲戌進士，授兵部主事；諫南巡，廷杖；後遷陝西按察副使，終工部侍郎。有集。

客舍

行役殊無已，其如歲晏何？
宦情因拙澹，鄉夢入秋多。
月巷千砧發，霜天一雁過。
吾廬今夜好，可惜掩松蘿。

吳鎧二首

鎧字文濟，陽穀人。正德甲戌進士，授行人，擢監察御史，升福建按察副使，歷陝西參政，雲南按察使，終僉都御史。

書營平侯祠壁

白草連天遠，黃雲出塞平。霜笳吹漢月，寒笛弄秦聲。北海猶傳箭，西戎未息兵。屯田當寧意，寧惜度金城。

涼州

聞道涼州戍，連年去未回。健兒多戰死，曠騎至今來。白骨紛無數，黃雲慘不開。龍城秋夜月，羌笛不勝哀。

林大輅二首

大輅字以乘，莆田人。正德甲戌進士，以工部員外郎，諫南巡，子杖繫獄，謫判夷陵州。嘉靖初，起江西按察僉事，歷副都御史，巡撫湖南，自劾歸。有《愧瘖集》。

林茂貞云：二山詩，在仕途者，忠憤激烈，無依阿取容之態；在林居者，沖適雅淡，無憤時嫉世之心。要皆出於性靈，非騷人墨客風雲月露之作也。

王應時云：二山詩，典麗雋遠，采人堂奧。

謝山子云：林詩樸厚，可比蔡忠惠。

林雨可云：二山詩，鍛鍊而不傷自然。

《靜志居詩話》：二山與南泠最相契，詩亦近之，第稍遜耳，品當在李川父、孟望之之間。

弔馬伏波祠

野渡維江舸，荒祠薦澗芹。魚龍喧水晝，日月照迷津。阻絕征蠻路，艱危報主身。只今嗟蕙苒，臨弔幾傷神。

蔣子雲都水定居西長安門外

南泠三載賦閒居，春日長安近卜廬。苑樹飛烟分客榻，禁鐘浮月散朝車。揚雄天祿多奇字，方朔金門有諫書。相望西橋應不遠，莫教風雨往來疏。

林炫四首

炫字貞孚，閩縣人，尚書庭楫子。正德甲戌進士，歷官通政司參議。有《榕江集》。

傷歌行

楚人不識鳳，謂是五色雞。魯人不識麟，謂是麕而蹄。天時苟不值，賢聖終見嗤。爰居避海風，享祀將奚爲。寄言明哲士，樂命安蓬閨。

有感用杜韻

將帥承新渥，軍儲惜去年。似聞千里霧，猶蔽九重天。貴戚爭開府，烽烟近到邊。玉關何日閉，遺恨自張騫。

十四夜月

今夜揚州月，清光已勝前。遙升滄海外，先到客亭邊。雲度同飄忽，風來一灑然。細瞻金粟影，猶少

半分圓。

次韻贈朱青岡太守郊行

聞得農人語，鶯花未足憐。夕陽牛背笛，春雨郭東田。政簡官如水，時豐俗自便。村村鳴社鼓，歡喜說今年。

孫存一首

存字性甫，滁州人。正德甲戌進士，歷官河南左布政使。有《豐山集》。

劉都幕泉亭

濫泉沸山巔，洑泉迸山足。一鷺飲廉泉，飛向西泉浴。

周在四首

在字善卿，太倉州人。正德甲戌進士，除知寶坻縣，擢陝西道御史，歷官浙江右參政。有《燕京逮

事錄《行臺紀興》。

《詩話》：善卿獨據胸臆，不事規撫，正如繁音迭奏，忽聆《于蔦于》曲，縱無妙理，具足清機。

悼陳司李

保定推官，被姦民誣奏死于獄。

灼灼木槿花，楚楚蜉蝣羽。朝陽耀容華，日夕不知處。人生非金石，誰能不銷腐。昨日同舍人，今朝成糞土。死者已無知，生者徒自苦。獨坐掩闥扉，哀哀淚如雨。

秋夕感懷

月轉虛簷向夜闌，孤臣不寐望回鑾。重門擊柝聲何急，半壁殘燈影亦寒。梁獄久淹書未上，齊廷難遇瑟休彈。凌風欲借仙槎去，天上銀河水定乾。

初下詔獄作

薄宦叨民牧，窮囚與寇鄰。

撫監有官民之分，官監稍潔，予獨下民監，與強盜重囚雜處。

不辭羅法網，直恐玷儒紳。縲絏嗟何罪，遭逢慨不

辰。鄒陽書未上，賈傅策誰陳。日有泥塗辱，旁無骨肉親。吟鬢經鎖斷，鞭血污衣新。野薤晨充饌，乾蘆夜作茵。亂蠅沾食穢，毒蝎螫膚辛。厄似樊籠鳥，危如涸轍鱗。經旬忘盥櫛，長日足悲呻。竊共

人愁語，徒勞吏怒嗔。獨行良蹢躅，群吠尚狺狺。薄力誅求困，虛情鍛鍊真。株連殊未已，文致竟無因。理直終何補，錢多信有神。虎翻令傳翼，象莫顧焚身。禍已延吾黨，冤猶念此民。病亡俱老弱，瘦死半飢貧。地下多新鬼，天涯少故人。禁嚴消息絕，家遠夢魂頻。自笑心如鐵，相看淚滿巾。尚祈欽恤詔，指日下楓宸。

閨怨

江南二月試羅衣，春盡燕山雪尚飛。應是子規啼不到，故鄉雖好不思歸。

桑溥一首

溥字伯雨，濮州人。正德甲戌進士，歷官按察使。

榆林道中

迢遞榆關道，西風卷客旌。寒沙迷古塞，落日下孤城。水險遮蕃騎，山高列漢營。君王方偃武，邊將莫言兵。

顧可久一首

可久字與新，無錫人。正德甲戌進士，歷官廣東按察副使。有《洞陽集》。

秋懷

異域滄溟上，孤城斥鹵中。經過稀漢使，託處雜黎戎。最苦黃茆瘴，兼愁鐵颶風。

集本作「日遠天何際，雲荒秋不窮」。誰能

忍羈旅，轉泊逐飄蓬。

李濂九首

濂字川父，祥符人。正德甲戌進士，授沔陽知州，遷寧波府同知，終山西按察僉事。有《嵩渚集》。

廖鳴吾云：川父詞藻俊拔，回出塵表。

俞汝成云：川父詩率意走筆，不事鍛鍊，有古朴風。

錢受之云：川父作《理情賦》，左舜齊持以示李獻吉。獻吉大驚，訪之吹臺。川父自此名滿河洛間。久之，讀書深思，始知獻吉持論之頗，而學者沿襲之繆。嘗有絕句云：「唐人無選宋無詩，後進輕狂肆貶詞。真趣盎然流肺腑，底須模擬失神奇。」又云：「洪武詩人稱數子，高楊袁凱及張徐。後來英俊崢嶸甚，興趣溫平似弗如。」當竄竊剽賊盛行之日，獨具隻眼，可謂卓爾不群者矣。

《詩話》：《嵩渚集》凡百卷，最稱繁富，然不甚剪裁。其持論，以明初「吳中四傑」爲歸，求其神似。未免類桓宣武之擬劉太尉也。

游呂公洞

窈窕呂公洞，逶迤玉泉側。澗流緬松門，石梁亘雲壁。始人日匿影，徐轉天漏白。靈窟度縈回，細徑緣欹仄。杖邊霏漸分，衣上霰微積。紫芝敷異芬，瑤草弄明色。窮猿倒窺人，仙鼠飛避客。遙遙薜蘿陰，嫋嫋蒼翠夕。金膏欣可餐，石髓恨難識。意愜諸妄遣，神超萬緣釋。伊予事沉冥，夙負山水癖。曩聞呂仙名，茲覽修真跡。丹爐滅灰燼，石牀有苔蝕。一遊洞庭波，千載杳消息。珪組知爾忘，烟霞恣所適。私哂名利心，躑躅竟何益。

雪竇寺妙高臺

吾聞妙高臺，海涌金芙蓉。上有萬古苔，虎豹留其蹤。日月挂天柱，烟霞韜石峰。所嗟異僧去，寂寞青山鐘。

含珠林

佛有舍利珠，瘞之海東石。夜來九龍爭，風雨拔林柏。六丁紛呵護，寶物安所宅。至今月黑時，光騰幾千尺。

石竇

石竇海眼通，乳泉四時洩。仰睇杳而深，誰剗翠屏裂。青巘千峰雲，白含萬年雪。膏砂原異竅，鳥鼠或同穴。

桃花坑

高僧飛錫地，錦石名桃花。吾非勾漏令，乃此逢丹砂。雲中吠仙犬，洞底流胡麻。定有逃秦者，人烟

隔暮霞。

太原中秋

紫塞中秋月，青天萬里情。他鄉一尊酒，獨對太原城。水霧戎戎合，陰蟲故故鳴。雁門諸戍苦，莫遣照邊營。

春興

碧草城南路不分，野人詩思正紛紜。聊隨謝客尋幽壑，何必桓譚識古文。春日苦耽新秫酒，洞天思謁大茅君。東風吹起花如霰，腸斷梁臺日暮雲。

秋懷

瀟湘楓落鱖魚肥，楚客懷歸未得歸。頻憶鳳城詢北使，尚聞龍舸駐南畿。驚心關塞旌旗動，旅食江湖諫疏稀。本乏涓埃裨郡國，擬將生事付漁磯。